

四庫全書

集部

欽定四庫全書

集部

吳文正集卷七十九

御史臣邱文愷覆勘

武英殿纂修中允臣馬啟泰

欽定四庫全書

吳文正集卷七十七

元 吳澄 撰

墓誌銘

有元徵事郎翰林編修劉君墓誌銘

嗚呼自謙遽去予而歿矣夫悲哉予在禁林自謙為屬
南還之日遠餞出通州明年將旨而至澄老病弗克奉
詔遂別予去未復使命以疾卒於家嗚呼悲哉卒之後

一年其孤塋觸暑走六百里來求銘曰將以今年十月
某日葬里之江井山嗚呼悲哉自謙姓劉氏光其名也
住上饒葛源人其先世初由彭城徙玉山大橫塘後家
葛源王考諱養浩宋太學進士廸功郎寧國府教授考
諱安國朝將仕佐郎湖廣等處儒學副提舉其仕南雄
路儒學正既滿遊前翰林承旨姚公之門勅授瓊州安
撫司儒學教授待次辟中書省斷事官屬吏扈蹕上京
分按諸郡疑刑濫獄之久悉白於長決遣無滯中書委

催海運不旬日萬艘集民食日給父憂解職服闋之瓊
以詩書禮義化荒服之民廣帥受詔捕賊檄參軍謀固
辭帥入賊境無可與議驛邀請不得已募百餘兵詣帥
壘畫計殄其渠魁活脅從之衆萬數自瓊歸創白石書
院祠朱文公而黃文肅公配以王考逮事文肅故也分
田贍養學徒省為設額行省為差官以教公朝復加旌
表焉據江西行省數月不合不留選授將仕郎寶慶路
總管府知事未赴徵補集賢掾史繼陞徵事郎翰林國

史院編脩官凡所撰述辭采蔚然可觀泰定三年馳驛
造吾廬四月還家拜墓以追榮考妣之命告于廟考贈
徵事郎江浙等處行中書省檢校官妣方氏贈宜人趨
杭起鄧侍講文原忽得疾再還家事醫藥八月浙省遣
使聘充考試官力疾見使者疾革不果行是月七日終
享年五十二九月訃達京師孤塋哭絕絕即日棄官奔
喪朝之間人數十會哭僧舍為文小奠平居赒施貧乏
救恤死喪銷釋怨爭熏為善良可以範俗可以經世自

少有志氣有才略小試于用皆所優為種學績文循循
儒行規矩中允矣其有猷有守也而用止於斯壽止於
斯嗚呼悲哉娶楊氏封宜人子男二塋中衛親軍都指
揮使司蒙古字學教授折國子生女一孫男一予之長
子文與自謙同年生次子京客都城恭自謙猶兄今則
已矣而予為銘其葬嗚呼悲哉銘曰

生才若茲不使有為天乎何其予之銘之不足於辭而
有餘悲

故承直郎崇仁縣尹胡侯墓誌銘

崇仁壯縣也數十年字民之官率未能大慰其民之心往往觖望近歲有簿斯邑者言曰崇仁之民有幸不久有賢令至問為誰則以胡侯對道侯之美略舉大槩聞者皆喜逾年予客外而侯至官比予還家則侯在官將再期矣入境問政而民之所稱加於前之所聞于時侯以病在假然未嘗須臾忘其民也病小間即出視事其病而在假也民悵悵若無所依其出而視事也民欣欣

若有所獲越數月始及一識察言觀色以證民之所稱
猶信又數月侯之病竟不起不間邇遐哀傷痛切若失
其父母俟之得此於民豈偶然哉其孤奉侯之喪歸葬
以翰林待制虞集所輯事狀來請銘予夙聞侯為銅陵
世家既閱狀復稽荆國王文公集所載侯之七世祖諱
舜元嘉祐四年進士官至著作佐郎少從王文公游公
為誌其父母著作之孫諱棟建炎二年進士官至朝請
大夫兵部郎官於侯為五世祖兵部之玄孫諱元一宋

末太學進士皇元贈承務郎侯之考也鄉先生阮翁奇其才而妻以女侯之母也侯自幼能文章有智略舅氏復以女女焉至元乙酉舅氏為建德守入覲侯以甥從蒙恩得仕一再授縣主簿寧國路之南陵建德路之淳安也一再授州判官嘉興路之崇德徽州之婺源也遷龍興靖安縣尹由靖安而尹崇仁其在南陵也有妖巫託神怪以惑衆雖長吏亦共恭信侯逮詰即首服受笞而去其妖遂息其在崇德也有詐稱降香使臣所過迎

接護送莫敢誰何侯獨疑其僞執而訊之果然縛送于
府宣撫奉使坐以法而嘉侯之明敏婺源州距總府數
百里山路峻險轉輸莫可賦粟每歲留州忽有令詣府
送納州民震怖官畏上令之嚴不敢以請侯自上府陳
利害府不能奪侯議民得免詣府倉感悅如更生婺源
廟有燈油田掌事者侵盜訟久不決侯言供神祠無益
之費孰若為國家養有用之才監察御史是其言以其
田界州學其牢靖安也驗戶籍高下以次受役不容毫

髮偏頗民糧不知主名歲責役戶代輸侯究詰所起竟得其人而役戶無代輸之苦人戶產去稅存一一覈實歸于得田之家酒課額有定而民之貧富無常貧或數贏富或數縮侯為均派隨糧數之多寡定課數貧民大便土兵害民縣不敢問侯捕治如法兵始歛戢其治崇仁也如靖安而尤整暇訟牒至庭訊其情偽曲者辭窮而退直者旋為剖析事不凝滯浸浸簡靜庭無爭辯之聲鄉無徵呼之跡惟日與名士講學論文而已胥徒改

營他業者十五六或障大溪之流以擅機春之利舟往
來輒礙告之官而官不理一日侯過其所適值羣小逞
阨阻數舟俟命左右猝拽至前進父老問曰此處舊有
陂乎曰無有灌田多乎曰不多陂之高低與隣陂等乎
曰此獨高曰然則非水利也徒阻舟爾目左右曰毀之
行事快人情多類此前時經理民田有司奉行失旨意
民大擾因重加其賦至是徵包銀錢不遣一卒令民自

推擇事未利而瞻者乃與徵晏然無動搖以病告致仕于府僚友徇民之欲不上其狀詔書命臺察舉守令僉曰孰有如吾侯者乎豈料終於官而弗及應時需也哉至治辛酉四月十六日終年僅六十侯諱愿自伯恭仕南陵時承務君小居宣城侯請以銅陵田園悉與守墳墓昆弟承務君歿事太夫人孝謹常就養于官及太夫人春秋高難遠適既受崇仁之命欲留奉侍不往太夫人再三諭遣乃不敢違弟懋致養于家侯得專志官政

以有弟也子立淳謹肯學未嘗干與公務一家孝友出乎天性府表其里朝旌其門蓋不虛美云侯之歿虞集同邑尉熊昶晨夕顧視經紀其喪事某月某日侯之喪至宣城某月某日葬某源予亦崇仁一民也故述邑民哀思之情而為侯銘銘曰

吏治軒軒久矣無聞天惠崇仁錫此令君四野耕耘三載一春遽棄吾民曾不逡巡侯來民訴侯逝民顰靡控靡因孰思孰勤極目蒿蔚江東莫雲千古松筠循吏之

墳

故千戶黃府君墓誌銘

黃氏之先邵武人也。廸功郎諱忠者來家江西之清江
鎮配楊氏以進義副尉諱憲者為子進義君配甘氏子
三人其仲千戶府君也。府君諱遵字正道生寶祐甲寅
十一月壬戌孝友敏悟根于天質一時名卿鉅公咸贊
異之長遊淮堧值至元革命受知元帥府用為管軍千
戶辭以親老歸未幾遘父喪致哀如禮兄弟繼歿悲戚

逾深奉母撫孤內外雍睦有前代義門遺風一新居宅
翰林承旨程公為扁曰後山堂蓋進義君嘗以蒼山自
號示不忘先志也母年九十蒙恩賜帛里中高年婦會
宴稱壽遠邇歎羨以為希有母病養不離側及喪致客
數郡年幾六十孺慕如少市失火延燎幾逮躬撫母柩
泣拜籲天俄而風止火息鄰居免燬並推孝感之功哀
毀成疾數年頗瘳皇慶癸丑秋復作彌劇一日止藥弗
進語諸子曰修短有數汝輩友恭克世先業吾死奚憾

言畢而逝八月甲戌也娶熊氏生子一曰子鐘先二十
年卒再娶喻氏生一男一女孫女二俱幼兄珪一子曰
莘弟浩無子鍾繼其後延祐丁巳十二月丁酉葬富州
會昌鄉之楊原先期鍾造門將期兄之命以岳州路平
江州判官皮潛狀來徵銘余謂范蠡英傑也其智足以
霸越棄卿相如脫屣豈區區勢利所能浼然一居於陶
則匪直變易姓名而已并與生平識慮俱變易而用之
於小是何也其居使之然也清江鎮大江以南之陶也

居其間者鮮不惟趨時計贏是務獨府君莊重閒雅儼然賢大夫之儀對客清談泠泠如壺冰盤露蟬蛻埃塈之表以詩書禮義淑後三世同財而無間言父無恙時譽望亦籍籍嗣之而興益以光昭居斯地也而有斯人乎斯古所謂不隨流俗者府君有焉非特余知之也風憲清流外服之官暨中朝之使苟賢且明者每見每聞莫不嘉敬而惜其不獲用於時是果何以得此於人也狀稱府君剛介自立不輕與人交事上接下各得其當

樂施與振流落不以為恩或受累不以為怨而為善益
不倦蓋撫其實云銘曰

昔銘其母今銘其子一賢一孝世世視效

勅封宜人孔母羅氏墓誌銘

延祐六年秋予留金陵客舍有太史院校書郎孔思則
衰經過予泣而言曰吾為三江三孔之胄南北既混吾
父歸曲阜拜祖廟遂如京師初仕教授嘉興路遷興文
署丞淮西廉訪司知事江西行省照磨陞儒林郎江西

等處儒學提舉不幸四年丁巳十一月十日吾父以疾
終吾母勅封宜人羅氏實相吾父以能有所立初歸逮
事吾祖母婉愉孝養無違為冢婦執謙自下以禮諸介
婦兄壽仁生四歲而前母周氏歿吾母撫育同於已出
後教授常德路遷瑞州路知事恩則年十七從吾父官
遊後教授歸德府遷太常禮儀院太祝萬億綺源庫知
事三遷而為太史之屬吾兄弟各沾微祿一皆吾母所
教不幸五年戊午十一月三日吾母又以疾終吾父已

得翰林直學士李之紹伯宗誌墓而吾母之葬不可無文也敢以請予于儒林君及其二子俱舊義不得辭明年庚申九月九日壽仁思則奉母父二喪合葬于里中桐水之原服闋壽仁以將仕郎改武昌路嘉魚縣主簿思則陞承事郎改濟寧路寧陽縣尹兼管諸軍與魯勸農事來索銘文乃書以畀之嗚呼婦人不出閨門嘉言善行非人所可聞見以其夫知其為賢助以其子知其為賢母是可銘已宜人所生女適歐陽孫男觀保福保

孫女四銘曰

若夫君子奮越而翔婦德母儀於焉而章

故游夫人余氏墓誌銘

澄外舅之弟余仲璋諱珪有女妙真生宋寶佑丙辰九
月年二十一歸同鄉游應鈴其夫君賢厚人也家素裕
相夫治家夫德益光家道益昌閩以內閩以外尊卑長
幼宗族姻戚下逮使令服役輒靡不稱其善元延祐戊
午五月以疾終明年十二月窆于株陂之原祔君姑余

氏墓右男通習進士業女榮適黃世英次適余震孫男
福孫孫女恩恕俱祥通奉父命來為其母請銘銘曰
維慈維淑維德稱福爰宅茲喚以引而續

故平山舒府君墓誌銘

舒以國為氏自江北徙江南家洪之靖安為著族府君
諱公平字廉夫其高祖邦佐宋淳熙八年進士任衡州
錄事參軍受知連帥朱文公未老以疾致仕官至通直
生四子其二選君之曾祖也生三子其長鄉貢進士獻

君之祖也貢士亦三子其三鑑君之父也君資識警敏
意氣爽邁幼年值家中衰從親往依外氏刻苦奮發期
於立身興家從其舅學進士詩賦馳聲應舉至再不利
貴富家競延至為子弟師一統之後君之父念故土遂
奉二親以歸收拾餘燼治財殖產日以饒裕竭力甘旨
先意承顏父喪哀毀廬墓側服喪母時年幾六十如喪
其父攜弟就學迄成人不更他師從祖兄瑞昌縣尹貲
富無嗣為之立後匡翼其家始終弗渝有族人貧困教

育冠婚計其逋欠罄所有不足以償則悉蠲之又一人
歿于外無以為殮輿櫬往殯鄰有病患死喪周之唯恐
或後命工斲材以給死而無棺者歲饑竭所積賑貸略
無乘時徼利之想友朋情誼尤篤見故人子閔閔焉望
其成或自遠來歸則買宅以居給田以耕與人語極懇
欵至有過必面責弗阿徇前依外家因學徒所資得田
百畝及歸鄉悉以分畀外家之貧族官定戶籍奉命總
覈一鄉凡有田不稅無田虛稅之家悉以實報蒙惠者

甚衆捕寇之軍留數月日有餽餉而弗以擾鄉鄰所俘
男女百餘早夜飲食之且言於主帥多獲釋免流民數
百入境邀重糈弗得則肆掠君與之約令勿旁騷當供
汝三日之食帖帖如約而去舒氏自通直公積德累善
嘗買田二千畝為義莊以贍親故之不給其鄉鄰之無
告者人食其德至於今而舒之福慶綿遠胤族蕃盛富
甲一邑子賢孫俊而文擢科預貢及仕於國朝者累累
有之君文學卓然不羣博涉經史於春秋尤邃文不苟

作必傳經理裨世教評論宋文推蘇明允第一後進寸長片善繩之不置一時秀彥多出其門曾受講書者尊稱曰平山先生延祐初行貢舉舉君為首辭曰吾老矣豈較藝時耶次科君已病遣一子就試曰汝能續世科吾死不憾君之母塗氏家世儒宦諸孫侍立必勉以學君之配熊氏事舅姑相其夫撫諸子俱不違則子男八紹隆嗣隆奕隆世隆系隆裔隆永隆昌隆克自樹立孫男十女六君生宋淳祐辛亥十月二十四日延祐丁巳

十二月戊午卒前時自卜藏于桃源之雲山將以某年
某月葬余過豫章紹隆以君之門人前鄉貢進士洪汝
懋所述行實來請銘曩余官國子監汝懋為國學生知
其言足徵也乃為銘曰

羣舒肇氏綿二千祀南宗趾美儒效有輝衡州所累基
此良士曾孫之子文葩行祇弗試遄已留其遺祉以錫
爾嗣

故鄒君孟吉墓誌銘

鄒仁俊改葬其所後父孟吉以父之友陳正則狀來請
銘謹按狀鄒君孟吉諱龍翔世居樂安天授鄉甘泉里
之河山生宋開慶己未六月七日父諱誼母鄭氏兄弟
四人君其三也娶登仲郎康某女沉毅明敏舉業外詩
詞尤工咸淳癸酉仲兄龍捷鄉薦刻志期於儻美而科
目廢飲酣慷慨每誦吾志非不如古人吾才豈不如今
人兩語元至元壬午十二月二十日遇盜以歿父命伯
兄之中子仁俊為後康氏鞠育同已出守節成之後君

十年卒君歿殯蔡冢嶺至治辛酉四月十七日改窆于里之黃田鄙於余為婚嫁之家因其有請而銘銘曰有志而莫試不得年而死于畏是可大歎無子而有嗣不時葬而禮則備亦可小慰已夫噫

故月溪居士袁君墓碣銘

余之同里而居者有橫江袁氏當其盛也袁與吳等埒宋紹定庚寅經虔冠殘燬吳族浸衰又四十餘年大元有南土袁族亦替昔之強武自立者日就微泯惟月溪

居士素卑讓不校能保其恒產以至于今於是齒敝舌
存之說猶信居士諱應祐字伯賢淳祐癸卯年二月十
九日生逮其父時聲勢赫張居士富家能和易謙厚
接物如春見者慕悅既為新民則敝衣草屨自抑自晦
然胥徒邂逅尊敬不減舊時蓋其質實足以孚愚頑馴
猛暴若此自幼不尚浮華之學而人情世故諳練洞徹
雖小技曲藝悉精究底裏余少亦喜雜學每過余談論
必竟日言言皆有裨益至元壬辰十一月五日以疾終

鄉鄰驚惋失此善人大德壬寅十二月二十八日葬會
坪雙髻峯下配黃氏大學進士之女子男二仕達仕崇
女一適李孫男二用昭用周女二適黃適陳曾孫男英
寶適李女後居士六歲卒仕達後二十三歲亦卒仕
崇將碣于墓以予與居士相厚善而來請銘乃為銘曰
中恂恂外欣欣與之親如飲醇想見其人徵此青珉

吳文正集卷七十七

欽定四庫全書

吳文正集卷七十八

元 吳澄 撰

墓誌銘

故居士劉子清墓碣銘

古者有猷有為之民不棄遺於皇極之世周南赳赳之夫皆足以勝千城腹心之任人之得生斯時何其幸哉去古既遠以逮于今往往有世不逢才才不逢世之歎

雖然世未嘗無才也俊秀消蝕於浮華淺陋之習雄傑晦滯於泥塗埃塢之場而世不見有才有才亦不顯世惟天質特異不可掩抑乃或間見其人人因事而顯其用若廬陵劉君子清蓋千百不一二也君生長郡城幼無父兄不事鉛槧之末豪宕卓犖超拔等倫勇畧兼優彊悍憚服也衛守禦之官絜材量力自愧弗及而降心願交焉在昔承平無事時固如此矣南士降附之初有不安新政潛謀作亂者君不能止則密白郡侯先其未

發而剪除之一城獲安全活百千萬命君一言之力也
鄧林山水奇勝介萬龍泉二縣之間異時多故家文
物其後軍寇蹂踐生聚索然君徙居其地人得所倚處
者安去者復遂成樂土龍泉邑西巨寇出沒行省官提
重兵督郡之軍民官同力勦捕地勢險惡莫敢前進以
君宿望而與偕行君選精勁民丁百人直擣巢穴擒其
渠魁殘黨悉平不受公賞自以私財酬賚其衆家居專
以賑饑為事視農務之緩急荒月之短長斟酌損益以

賑跨兩邑之境數十里之氓得粟如寄雖甚凶歲無饑邑積粟之家轉相募效發廩平糶不敢壅君實為之倡也春而貸粟冬始收值減時估之半歲以為常三十餘年穀不貳價至今守為家法凡衆力修完之事靡不樂施於浮屠氏崇信逾劇然發於衷忱非受其誑誘也一神祠施五萬一禪刹施二十萬圓通寺塔九級將獨力成之其他瑣細不可勝數也所居控舟車之會舊識新知貴游賤役之所經從風雨莫夜亦或造門各愜所期

而去仕宦退閑非有權勢致餽必腆甘貧能廉者尤所
加敬二縣之大夫以事詢訪必為剖析贊決俾有裨益
罰直慷慨語無不酬奉身之物不尚華侈几案必整洒
掃必潔綜理周密內外秩秩獨處一室飲食起居率不
離是坐至午夜肅容端嚴待賓客恭待鄉黨謙雖童孺
亦不慢易不治詩書暗合義理尊禮師儒彌久彌篤時
或躬聽講授晚年每日令人誦說論語一章君諱泰生
宋淳祐丙午六月三日其平冠賑饑例可得仕而素心

恬退辭避不願有元至大辛亥六月十八日微疾而終
殯後園營宅北於龍泉南溪之陽坑延祐戊午十一月
廿八日乃葬之頃以南康路學正劉參狀來請銘余稽
諸易時之屯而後有君子之經綸世之有事而後見人
才之有用苟非卒有異常之變辱夫腐儒清談虛譽之
士駭汗束手則亦何以見一時應變者之為才也劉君
當無事時已穎然特異及有事而小試其智勇雖不大
用而其才槩可知也余不識君而高其人如之何而不

樂道其善也耶狀謂君有全城討賊之蹟賑荒濟施之仁排難解紛如仲連之勇重義結交如朱家之侠致富如陶朱公而不吝捐費躬行如萬石君而通達時變惜有其才而不展其蘊然五子文采志氣卓然成立存時親見有子身後業益隆其興未艾天報之也模寫益得其實云君娶仇氏子和孫平孫安孫寧孫盛孫男二孫女三銘曰

力掣巨鰐巧接飛猱惡草以薅良苗其膏允也人豪定

此時騷粲粲寶刀乍試遍橐英英旆旄一展求綱已不
居勞人自興褒計然策高彷彿六韜吾樂吾陶萬輪千
艘擷我土毛哺彼羣髫林蔭摻摻溪流滔滔世產譽髦
天不慢惄

故逸士黃幼德墓碣銘

古豫章郡之豐城縣今為富州往年余暫息其地有士
黃東來見年少而務學其父幼德亦來見敦樸謹愿異
乎流俗士余甚喜之越十有四年幼德卒明年其子述

其行請銘其墓余按豐城之黃不一族幼德之考諱嗣
霸居會昌鄉之攸樂娶李氏生二女擇同姓中之才且
贊者為嗣於富城某鄉冷水井之族得幼德諱淳溫厚
和粹工進士詩賦又改治經弸中彪外蔚然可觀至元
丙子考死於畏王考年幾九十矣聞變哀慟而殞幼德
能殮凶渠以伸不共戴天之義葬其王考及考以下凡
七稱其文揆以為子之道靡所缺違會縣陞為州賦役
繁重支柱不易幼德不肯以笞械毀傷其體寧喪其土

田而弗顧既貧遷避清江城中授生徒以自給十有一年復于故里新構至再名其堂曰忍默受業而成才者有族弟可任為征東儒學副提舉逮其身後猶為之訓諸子延祐庚申三月十日終於書館年七十有二子東護喪以歸道路觀者噴噴曰善人亡矣五月六日葬里之竹山幼德之學知以經為本恪循儒行不少越規矩發為詞章謁乎仁義之言配范氏亦令淑東之文有古風明理端身不忝其親者也女適甘銘曰

言可諮也動可儀也噫斯士也遘斯時也生而止於斯
也使其死而泯焉莫之知也惡得不為怛然以悲也

故曾明翁墓誌銘

嗚呼家猶國也其興豈偶然哉興其家必當其會當其
會必有其人其人必才與福備而後興唐以來吉撫號
江右望郡兩郡之交有山聳秀特起曰華蓋俗傳古神
仙所憩華以西先屬吉之永豐後屬撫之樂安鄉名
雲蓋里名望仙因山與仙而名也望仙之地寬平廣衍

山水環合自昔宅其地者多興盛曾為甲族有監鎮君能以其資力得官稱倜儻任俠游客輻輳其門聲譽聞數百里有司戶君進士乙科第一而曾不獨以資力雄又以科名貴矣逮宋之末漫漫以微地靈渟蓄蓋有所待南土新附之初山藪寇聚官不能治則委重有謀有力之家而望仙之曾乘時復興君煥煜字明翁豐下端凝儀狀甚偉父杭長厚人也郡縣所倚信君有兄有弟兄總家務于內弟理兵務于外君出入官府同心幹

父故能為官之翼衛鄉之保障盜息民安而家日以饒所謂當其會有其人材與福備而興者邪君宋寶祐戊午七月甲子生元延祐己未七月癸亥卒有子競事文學希受泗洲天長縣教諭坦塾同遊京師蒙古國子監以坦長其弟子員中書省以塾充侍儀司之屬奔喪而歸明年十月癸酉葬于楓林之原塾具書俾希之子欽偕其里中士蕭泉持同知來陽州事黃常所紀行實來徵銘塾也欽也若蕭若黃皆及吾門者而君之善有

可書銘其可辭也乎初鄰境未靖里人築堡自守受寇攻圍告急求救率衆往援寇遁堡完男女數千口喜得更生資財牛羊惟救兵所欲圍解遄去一毫無取既而携金報謝復卻不受人感其恩又服其義由是名德益彰平居事父侍立終日隆寒盛暑不變父或就養兄弟之家晨昏亦往定省母嚴氏夙喪生日悲痛不忍舉觴里嫗與母同年嘗以飲食醫藥為奉曰見斯人猶見吾母兄既歿與弟友愛彌篤周族鄉黨之貧有不能葬

琰之病饋以藥飢賑以粟全活不可勝計比其終也遠
邇嗟嘆北來遊宦之人雖識面入哭必哀其感服人者
如此娶鄧氏男三而坦出為族弟後女二一適羅一在
室孫男五欽長其次鑑鑑鐸鍼孫女二銘曰

身之有技而以著氏家之有嗣而以顯世往者已遯來
未可渙其滅其熾於此乎珉

故曾夫人袁氏墓誌銘

鄉貢進士曾尹甫諱夢薦之子一元自幼與余友善情

若兄弟聘吾鄉袁崇甫女為配素氏生宋淳祐丁未六
月八日年十六歸于曾孝養夫之所生母如君姑其夫
族多富而夫家獨守儒素夫有學有文工進士業中值
易代困厄相仍晚乃康裕頗得自適內有良助協心理
家前處約而志不歟後處樂而志不盈嗚呼貧無怨富
無驕在士大夫猶為難事而婦人能然可謂賢也己元
延祐庚申二月二十五日以疾終是年十月十六日葬
雷凹先期余獲觀其宅兆而并請余為銘男復孺復參

俱娶黃復可娶劉女德淑適登仕郎張希賢之子洪德
靖達貢士董省翁之子午男女庶出者二愛之同已出
孫男三繁娶唐衍娶張其三曰文余許以孫女妻之孫
女六適游通張仙弟張仍祖張泰生游南生一在室曾
孫男又生曾孫女慶娘銘曰

昏姻之家文學之友其配也賢銘示永久

故王夫人于氏墓誌銘

金陵隱君子王仁甫之配于氏卒俾來以書遡大江而

西轉彭蠡而南走二千餘里抵余山中其子子霖自述
其母夫人行事大槩言曰吾母諱貞其先吳興人後徙
金陵少孤性至孝事季父如父年十八歸王氏吾祖母
治家嚴明吾母柔婉承順凡飲食起居節適早莫寒暖
之宜奉侍不少懈怠十六年如一日尊夫之兄如舅敬
諸姒如姑視從子如子姑歿四十年言及輒流涕時
祭追慕哀動左右治家一遵姑訓子孫既皆成立謙抑
猶如為婦時教子女慈而嚴待奴僕未嘗厲聲有過每

為掩匿勤勞者畜之惟恐弗逮王氏內外宗親或孤不能嫁貧不能娶則為之嫁娶俾及時各有家室吾父好施死而無棺者畀棺病而無藥者畀藥寒而無衾者畀被衾遇凶歲施粥施麵施鈔計所費前後不啻數萬億吾母竭力營助畧無吝意戒子擇交賓客及門竊聽其談論所言若有規益欣然為具酒食否則退必譴責於子若孫之師禮之極隆溉灌器皿灑掃室堂務致其潔威儀辭令從容以和吾父嘗謂吾家所以成皆汝母之

力年踰七十視明聽聰臨終言動如常命諸子至前一日訓戒畢瞑目而逝生於宋淳祐己酉九月三日卒於元延祐庚申正月十三日其年十一月九日葬江寧縣安德鄉石岡之原男子雲子霖女適徐應隆徐煥章呂元知趙良弼于德淵一在室孫男九瑜瑄玉璐璫璉璗璻璣孫女十二又曰先妣母儀婦道先生知之詳信之深不幸至於大故閭極之恩萬死莫報幸賜銘文以示永久以光幽陰以慰子霖無窮之哀余讀之竟愴然以

悲嗚呼古今興者必有其由匪特有國者然有家亦然
王氏世傳長厚值時運遷革而家之興浸浸未已雖云
世德所積內德蓋有助焉余客金陵嘗主其家備知仁
甫夫婦之賢子霖從余學喪其母甚戚乃為叙次其語
而與之以銘初仁甫未有子子其仲兄之子子雲是也
撫育恩愛實同已出次年子霖生銘曰

淑德惠溫不出閨門善相夫君施及子孫懿美其存莫
可殫論著以銘文永世有聞

欽定四庫全書



卷七十八

欽定四庫全書

吳文正集卷七十九

元 吳澄 撰

墓誌銘

故臨川近山居士吳公墓誌銘

吾同姓也吾同郡也長吾一歲實長三月十有七日爾壯年值大運革不困於政役益昌其資產父存克相其樹立父歿克光其繼述處時之艱如履坦途富而康且

寧以孝於親致養及耄耄疾而憂喪而發睦族敬老禮賓仁衆優遊林泉彊力健步八十有五無病而逝德而壽且考終已五福備者哉吾同郡同姓中有斯人其生也吾欲兄事之而不可得其死也俾吾誌其葬庸詎可辭乎嗚呼臨川之北安定之鄉槲峯之近石塘之原此吾近山居士君之宅也君諱仁彬字明叔曾大父顯祖大父必興父有明母黃氏生宋淳祐戊申十月二日卒元至順壬申五月三日配劉氏同年五月生至治壬戌

閏五月卒君卒之年十有二月壬寅合葬焉子男三人長聖任汀州路蒙古字學教授次聖和俱亡唯少子聖達在女四婿黃張李雷孫男六女三曾孫四銘曰

堂堂斯翁五福萃躬隆隆斯藏百世允臧

故逸士張君靜翁墓誌銘

樂安南鄉之張號為富族其時有工進士詩賦者馳譽鄉里伯仲聯貢于禮部曰炎發曰公著其季希賢亦以登仕郎應轉運司貢南土既歸天朝登仕君先二公而

歿子五人家嫡元定字靜翁年甫十有九已克樹立鞠
四幼弟長而畢娶均先業以卑一無所私時多艱虞持
守未易乃能完其所有浸浸底于興盛年三十有七未
得子慨同祖同父之嗣續背單獨謀於昆弟奉母董氏
命取母之孤姪子之名楠年四十有八子彬生晚慕引
年度世之說退居南園自稱丹霞子傳家事於長子楠
謂堪付託也年五十有九析資產為二明年命二子各
掌之又明年翛然而逝其生也宋開慶己未六月其逝

也元延祐己未四月歲辛酉正月八日葬雲蓋望仙里
之大塘鳳阮凡三娶賴殷歐陽長子婦羅幼子聘袁女
女適何適鄧適余孫男竹壽陽生至生孫女繡娘永豐
傳應甲為錄家世大概卒葬歲月前葬期十日楠哀經
造門以余所親老友曾一元書來請銘靜翁余所識聲
實每相聞昔也與其伯父二貢士善今又重曾之請於
是乎銘初邑有惡類乘勢暴橫莫之敢擾遠近富民不
為所役服則為所魚肉靜翁嶷立其間能不黨附又免

禍害人以為難銘曰

大夫士庶人在保家在謹身嗚呼靜翁保其家以隆謹
其身以終是可銘也已傳所錄曰楨幹一家綱維鄉邑
無赫然之聲有隱然之重其言蓋足徵云

故槐庭居士王君墓誌銘

吉水王元福將葬其父居士君介新昌州判官李路來
請銘往歲元福客遊京師嘗及吾門文雅俊秀佳士也
今也惄惄懇懇揚其父之美惟永久是圖噫孝子哉謹

按所述行實居士君諱思恭字敬甫家仁壽鄉之盧溪
世以積善稱警敏恢廓有才有智吉水與永豐鄰至元
丙子訖癸巳甲午寇出二境居者不敢安于家行者不
敢出于塗環二百里生理蕭然垂二十年官莫能制有
邑佐知居士足辨此事委之根捕不一月間獲其首從
空其巢穴自是遠邇安靖至今德之人有爭忿詣門求
直諭以理法靡不心服無復至公府焉或與已不合而
加誚責既而再見歡然畧無芥蒂賑恤窮匱施不望報

勤儉起家至於富饒質朴恬淡不易其素它無嗜好惟
頤崇異教祈種福果對客間喜諧謔見儒士則改容莊
肅延師取友以淑其子迄克有成里中先達號曰槐庭
蓋以晉公之期其子者期之也曾祖考世隆祖考餘慶
考嘉謀娶梁氏先十年卒子男二長元福也次元善女
五婿一阮一龍二龐季在室孫男二文金同老女一居
士生之日宋淳祐壬寅仲冬中旬之九卒之日延祐丙
辰仲夏上旬之十寔之日丁巳孟春上旬之六葬之兆

同水鄉同江之原銘曰

存而不耀沒而不朽維子之孝維父之教

故竹隱居士周君墓誌銘

崇仁西館之周宋建炎時始來自廬江其初祖也六世至居士君君諱某字信甫謙厚真實善治生殖財家以饒裕至元新附授邑征官鼴勉受檄隱處不出鄰寇奄至大掠居民要重賂始放還否則戮一時倉卒費無從辦委命待盡而已君為惻然悉捐己資贖之寇手得完

娶者殆百餘家鄉之人病不能致藥則為之醫死不能具棺則為之葬凡隄堰橋梁道路苟利於人出力修之無倦寬道恤貧卑艱輒饑以為常環數十里有德無怨宅邊多竹自號竹隱居士生端平末歿大德甲辰娶吳氏克相其夫子某命于朝再轉為江州路司獄在官廉慎不忝其親某年某月某日葬居士為某鄉某原以潭州路儒學教授虞汲狀來謁銘銘曰

積之贏脅以榮慶之縣尚嬪媽

故復軒居士吳君墓誌銘

宜黃之邑居者吳與鄒涂為巨族宋咸淳間予客于鄒元至元間又客於吳得與三族之人接吳之盛自參議四子其三曰驥驥生兌兌亦四子其二曰鎰字子萬業進士詩賦以登仕郎兩赴江西轉運司試不偶自此絕仕進想為人端莊靜重談論暢達篤實所言皆敬身明倫之要應世處事之方居家禮法整肅嘗書參議公遺訓于屏以示子孫族姻鄉黨率取法焉中年以後界家

政于子蘭石圖書滿室清致構亭山椒前瞰林泉幅巾
野服逍遙其間儒書外兼誦釋典有所悟入故于世累
畧無芥蒂初名讀書之室曰清再名便坐之軒曰復亦
可見其志矣今年春忽得疾子若壻迎醫進藥君却去
曰吾年八十有七於平昔交遊中獨後死死復何恨娶
鄒繼趙子男四玠琳瑞登琳登早夭玠及長孫亦先卒
孫四婿鄒邦材鄧文陳煥文也幼女未適人而殤適鄒
適陳之女亦先卒孫男四鱗孫以直奇孫止孫女二曾

孫男二慶老同老女二君生紹定壬辰九月中旬之七
日終延祐戊午二月上旬之四日先自卜藏於仙桂鄉
之富原孤子不敢違將以是年十一月甲申寔陳煥文
以鄧文所具事行來曰先生與吾外舅相得敢求一言
予不辭而銘曰嗚呼

古所謂善人君子其可使鄙寬薄敦者耶今而後經行
攸止其孰謂齒德俱尊者耶用章厥美示于後昆翁雖
逝矣名則長存

故黃母甘氏墓誌銘

清江鎮黃遵孝於其母所居綰江西貿易之都會言議
容止溫然有士君子之風母年九十時子孫列拜稱壽
高年同宴會者內外百餘人巷里誇詡為盛事平居養
志承意率類是其明年春母卒遵哀毀戒兄子擇佳山
水寧體魄得吉兆于閣漕山之陽將以至大元年某月
某日葬走書來謁銘余夙知遵孝又知母賢遂不辭而
銘母姓甘氏族在豫章豐城奉舅姑恐不及姑年至八

十八日背臂瘻不為苦以有孝婦也理家寬厚撫下恩勤愛諸子一如己出訓諸婦以順水陸舟車之衝過客日及門居中審所宜待遇輕重不忒家饒口衆居湫隘不足容命一新堂構時年八十五猶能總理工傭細務既落成喜曰吾悉置家事佚老就養矣年八十九受公朝賜帛門外衢道缺圮捐貲募石工甃之自西徂東延袤若干引踰月始完塗旅大利性儉約不麗服飾事筐篚老且不倦殘帛敝屣雖小不輕棄擲至周急救患多

與而無難色長子珪少子浩先卒遵中子也女子嫁問里毛孫男三珪之子革遵之子石其次鐘為浩後母命也孫女二曾孫男一女四嗚呼以閨中婦人相其夫成其子興其家孝慈勤儉好善樂施如此天之報之也五福備豈偶然哉三孫通練敦重秀敏氏其未艾乎銘曰於淑斯母所積者厚卜藏允臧子孫其昌

故朱夫人葛氏墓誌

葛金溪望族宋末諱洪者治春秋有名充撫州貢士舉

首至再其女歸同邑朱朱亦望族也既有子而夫亡年
八十一以壽終延祐四年春余過朱氏之族子淑權累
繫然衰絰來告曰吾母諱懿柔端平丙申三月生婉順淑
慈簡儉和睦女工外嗜讀書古今一過目輒記憶醫藥
占筭冠擇之書亦且諳曉視人翰墨雖草書展誦畧無
滯澣宗族鄉黨之人某年登科某年赴某處任枚數歷
歷不忘自不能飲常造美醞客至稱家有無待遇如禮
談論終日不倦教子嚴謹惟恐或後謂子不知書雖有

如無又謂吾父以春秋一經為江東西進士師貴公富室子弟悉來受學及葬旴江包公有文遣孫致祭吾姑適新田吳其伯子與吾父同年預舉其季子少年登科汝輩所宜慕效嗚呼慈訓在耳遽至大故痛哉叔權年十四喪父賴母保守遺業歲時祭祀不闕不幸吾母以去年十一月逝矣將以今年某月葬里中汪家園顧惟不孝弗克顯親先生肯賜之銘是有以慰吾親於九原而覆日月其遺脣也敢以請余禮辭則固請余於夫人

之父素所尊敬又與其夫族二三子者遊乃為之銘銘
曰

幼為名家女長為名家婦願子孫世世讀書無貽祖宗
羞夫人臨絕時語也嗚呼以婦人而能若是可謂難也
已

有元忠顯校尉同知吉州事鄧君墓碣銘

宋咸淳癸酉撫州所貢進士詩賦第一人鄧君希顏字
廣淵仕皇元由巡檢授麗水縣尉繼授徽州路平準庫

使進保義校尉通山縣主簿轉忠翊校尉岱山鹽場司
令以忠顯校尉同知吉水州致仕泰定丁卯五月某日
終年七十四是年十一月壬申葬于慈原之邱既葬子
謙來乞銘鄧金溪大姓也其先自蜀徙宋南渡承信郎
零皆同邑傅氏因禦寇捕官且俾世襲自推一人統領
其衆終宋之代號鄧傅二社鄉兵至迪功郎時昇族彌
盛君之曾大考克靜大考持志官進義校尉考鄧子贈
忠翊校尉同知建昌州事妣吳氏贈宜人君英毅秀敏

慷慨負志氣文辭類其人貢于鄉時年甫二十革命之際遠鄙未靖君輒衆護里閭旁盜不敢闖為官出力掩捕賊寇行省議賞署巡檢職留鎮鄉社如初十年間歷三仕始換敕命為尉為捕辦訟明審抑姦遂良承檄鞠獄發擿如神雨造疎服筦庫司醒俱稱能官及將告老醒戶咸惜其去曰寧復有明惠公恕如鄧司令者乎退間之後預營壽藏築室其側以俟宴息嬉遊焉處鄉和易居官廉平好善若已有規過面責不隱人遇禍災雖

踈遠聞之惻然娶洪氏封宜人後君一年二月辛丑卒
年七十三天歷己巳正月癸酉葬白馬黃通市子男五
頤同人大有謙菜頤臨江酒務謙為弟希說後女二壻
上官銓危顯孫男八其一後兄之子其一後弟之子女
八已嫁宥五曾孫男一嗚呼君可武可文位不與才稱
竟未獲展惜哉銘曰

彼哉謗謗而或顯顯維茲闡闡而尚繭繭所留者腆所
逮也遠有隆無殄有嶧斯歎

故貢士陳君墓誌銘

昔聞蘇文忠公中制科僉書鳳翔府判官公事其鄉人
陳公為太守不假以辭色蘇公甚不平陳公曰吾視軾
猶孫也以其年少暴得大名懼其滿而弗勝乃不吾樂
也余因是高陳公之為人咸淳末別院省試第一名陳
黃裳蜀人也仕國朝提舉江西等處儒學與余友善至
元元年間龍興路總管陳元凱洛人也歷廣東湖南浙
東三道廉訪使余及識之皆鳳翔守之胄也至治二年

夏余在金陵提舉君之從子瑛言其家世鳳翔公諱希亮四子伯曰忱仲曰恪叔曰恂季曰慥廉訪使伯之弟孫也宋紹興參知政事與義以簡齋詩名於一時者叔之孫也而季之子用之生主簿端卿生鄉貢進士嗣寶嗣寶生贈承務郎圭孫圭孫生通直郎賜緋炎已炎已生坤文字獻子黃裳之兄瑛之考也幼事通直君供子職已異常兒比長淹貫經史夜以繼日嗜學忘倦漏下二十刻猶正身危坐如嚴師畏友在前雖初寒盛暑不

變識高論正於家傳易學尤邃三以進士貢禮部晚年江浙省命長饒之慈湖書院弗就老於家每旦焚香讀易客至論文賦詩盡歡而罷大德丙午十月丙辰終得年八十是歲十月庚申葬上元縣鍾山之原配張氏提刑之孫運幹之女勤儉治家絲繭麻枲米鹽細務莫不綜理暇時以孝經論語古詩口授諸幼蜀之故家咸稱道以為內則至元丙子終得年四十二是歲葬江寧縣之冠山子五人琦江寧縣學官瑛廣德路教授琛蘄州

路教授瑛寧國路教授琚從事常州路女歸婺源州判官許松孫男七曾孫男一瑛請曰先妣葬四十七矣今將遷以合於先人之兆冀得一言碣諸墓遂以貽永久余見金陵至今尊慕貢士君為碩師耆彥而余素與其弟提舉君厚乃尚論其世而繫之以銘銘曰

允邈斯氏世友所累允卓斯士天閥所美躬也弗侈噫其有俟噫其有俟其有以嗣

故逸士廬陵蕭君墓銘

鄉貢進士廬陵蕭濟美自狀其父俊民甫之行而澄大
母之孫姪何中以其書來為之請銘其狀曰先君子諱
德孫經傳子史九流百家無不貫通下筆數十言倚馬
可待平生所為文號師心集時文不與編集聖賢所言
性理濂洛而下議論分門考訂名曰理要討論山川形
勢古今封域名曰地志沿革謂詩自三百篇後離騷無
體不具數刪後諸家詩名曰詩體家吉水之虎溪土俗
頗澆薄科未興時各棄學規利先君子曰蕭氏讀書餘

二百年詎可墮其家聲繇是宗族子弟不易所守剛直無私然好稱人善見人有過異與善道俾遷善而不自知不諂交富貴客來論文危坐竟日鄉俊秀從遊得指授文多可觀處族和交友信居鄉義教學者以孝弟為本祖修職郎建昌南城丞諱正父登仕郎諱玉服父喪哀毀踰禮養母疾三月不解帶母壽八十二親既終忌日號哭盡哀事伯兄如事父與弟同爨四十年無間言弟先歿長其孤嫁其女弟之子又歿五年凡四喪給

其醫藥喪葬雖貧不辭費兄弟俱有文學人稱虎溪二
龍馬賓興制下欣然率諸少就試既而黜則曰命也次
科不復往延祐庚申濟美與貢戒以母矜母怠至治辛
酉下第則曰此吾子進德機也藏書千卷及胡忠簡公
楊文節公清江謝公章公工尚書諸人翰墨數十年常
令愛護此家寶欲以見先世受知於先正若是書外無
長物而於利澹如也身長七尺重厚端嚴鬚眉皓白衣
冠偉甚有商山老人風年七十二無疾而逝泰定丁卯

九月朏也將以明年某月某日安厝於某鄉某原濟美
痛念先君子老於山林懼至沈沒泣述言行之槩伏惟
哀而銘之則先君子為不亡矣先妣張氏先十二年卒
子二濟美專美孫男六女六濟美之文章繼父業名位
不難致然果欲立身顯親與天地同久長尚其索諸文
章名位之外乎而予之言又奚足恃銘曰

鳳彩虎彪有鸞有彪自樹允卓斯原平秋

吳文正集卷七十九

欽定四庫全書

集部

吳文正集卷八十一

御史臣邱文愷覆勘

武英殿纂修侍讀臣陳嗣龍

欽定四庫全書

吳文正集卷八十一

元 吳澄 撰

墓誌銘

故太常禮儀院判官文君墓誌銘

至治三年八月二十二日太常文君矩子方卒于京師
其孤在江南長沙友人侍儀使劉迪太府經歷樊謙為
之棺斂屬澄銘其墳石使歸而刻之埋諸隧澄於君亦

有交義乃哭而畧其辭曰君先有自趙郡徙居長沙者
令遂為長沙人考諱曰新玉沙縣令贈驍騎尉奉議大
夫宜春縣子母譚氏封宜春縣君初君生嶽嶠即不喜
其俗甫知學讀孔子書明修己治人之術益欲奮起樹
立有為於世湖南道廉訪司辟署書吏時翰林盧公摯
實廉訪湖南敬其才辨遇之殊常人君以盧公為知己
樂從之後吏部考年勞叙遷大德十一年授荆湖北道
宣慰司照磨兼承發架閣於是朝之卿大夫悉知其名

不肯使之官外地留補刑部宗正曹屬轉為登仕郎秘書監校書郎延祐三年陞從事郎為著作郎延祐六年改翰林脩撰文林郎同知制誥兼國史院編脩官至治元年國家議遣使持詔諭安南國君被選為奉議大夫佩黃金符奉使安南復命稱天子意進太常禮儀院判官妻張氏封宜春縣君先君卒子一人鎖住未冠女一人許嫁金湖廣行省員外郎劉藝之子某未行嗚呼君負當世辨敏之資究之以問學宜其有所設施然使其

就於用則必能不失其官以成一時之功往往為小夫
鉞誓而君巍然自信不顧可謂古之奇男子者矣其文
章歌詩雖疎宕尚氣有陳事風賦之志焉惜其未傳而
遽止也比君未卒二日澄偕今翰林待制虞集往候病
君曰吾苦殆甚不如一旦溘然也余二人相視泣不敢
下而退既而果逝其僕夫課兒扶其柩將以今月二十
六日反葬于長沙嗚呼是皆可傷而忍不為之銘邪銘

曰

其位弗崇也其才弗充也天胡弗壽之俾其有終也有
幽者宮有坎者隧具石刻詩百世其安之

元承事郎同知寧郡州事計府君墓誌銘

計氏之始卒然以善謀算為越大夫師因其所長為氏
漢有訓後漢有子勲察之尚書郎用章暨良輔暨有功
並蜀之邛州人登科紹興間太學釋褐官至國子司業
以朝散大夫奉祠而終者曰衡居饒之浮梁其先蓋自
蜀徙司業之子曰黷紹熙進士為縣令縣令之子曰袞

卿無子而弟良卿之子君錫後之其配新猷縣尉之女
張氏子四長寧都府君諱初字遂初皇元太保府掾史
授承事郎同知寧都州事在官卒歸其柩將祔葬西里
之先塋孤惄述其父之所行命其弟毅走京師乞銘恕
之言曰吾父孝於親祖母病盲哀憇顛天舐以舌目頓
明人驚異以為孝感劬書不倦為文立就士論推舉充
書院縣學儒官既而試吏池州路司業公昔嘗守池一
介不取捐己俸作石橋以濟民逮吾父至復為增葺佐

治多所便益民曰真清白太守子孫也以曠於定省棄
去行省改調鄉郡闢館迎養郡士日從先祖倡詠坐客
常滿足以致其樂吾父入聽嚴訓出理公務饒父母邦
也知民間利病尤悉遇事必抱牘與官長執可否久亦
自厭復棄去丁先祖憂制畢郡以茂異貢禮部尚書王
公薦于太保曲出公掾公府七年未嘗有所違忤秩滿
祈便養延祐六年六月受寧都之命安輿奉祖母赴官
寧都舊解一吏日攬民詞十餘皆架虛誕訐漁獵廢所

欲則火其牘繫者充斥吾父一一審覆出之屬縣石城
造偽鈔者挾舊怨誣指樵人囚三年矣吾父疑其誣一
訊情實畢露卽免樵械縱之還家同僚持不可吾父具
公移稱設有脫誤甘自抵罪樵乃得釋猶熟未獲耕者
宿于田以備盜竊有富民與其田主爭是田夜遣衆刈
其稻且歐耕者耕者與敵揭竹椿搥之越翼日傷者斃
富民乘忿賂羣吏以夜為晝以闌為殺以竹椿為田器
論置重辟吾父察其寃詣郡力辨耕者免死寧都之民

多隸役人列名於軍籍軍民雜處倚勢負險官府有令
輒拒獨見吾父署字則欣然稟承吾父嘗造其地老幼
扶執酒果自山谷出迎如見古循吏然州之戶版素
不明富無實糧貧有虛額每歲催徵曆設職以代輸坐
是破產者衆吾父作意釐正民莫敢欺有自首隱瞞至
千石者由是差徭適均官政粗成而吾父勞瘁得疾郡
有命猶強吾父卧治俾便宜處置然以先祖之葬有缺
病中念人子之大事未終遂謁假竟歸會寧都飢民嘯

聚州促復職甚棘白之祖母祖母曰汝其行我及境
旗鼓挺刃交錯絡繹從者悚怖吾父呼之來前諭之
曰我計某也今再來矣爾少安當使爾無飢於是召富
民勸盡發有粟之廩擒首亂者四五人而散其衆郡守
貽書褒嘉謂賢侯不至寧都其再寇矣憲府亦以是薦
舉焉州數年不雪民苦瘴病吾父至之年大雪彌日旱
禱雨未應吾父力疾出禱大雨如注民歌之曰去年雪
今年雨微計侯那得此民既悅天應喜吾父得代歸舟

將發病復作逾劇諸語子曰吾久困於病殆不可起有
老母不能終養汝善事祖母是為能繼寧涕泣歔欷無
一語它及卒於至治二年十一月十四日年五十一年
遠近聞喪若吏若民無不悼傷吾母甯氏恕有三弟壽
毅思俱紹世業為儒女第一恕壽已娶男女今三人恕
等痛惟吾父有家學而不以世科顯有時才而僅僅小
試於州倅行無愧祚而天嗇其年孝誠感神而不獲終
養以殫為人子之心天乎天乎諸孤薄祐之故嗚呼痛

哉予聞其言亦悽然以悲是以不辭而為之銘其葬某月日也銘曰

有才孔多命也其奈何有子克嗣父也其不死

大元中大夫益都般陽等處路陶金總管孫侯

墓誌銘

成周設官內饔為冢宰之屬其職重矣以朝夕饋饌贊
近尊貴故也易牙之名於齊杜賓之名於晉其間固有
能臣焉總管孫侯諱繼寧小字德童浚儀人金未徙奉

聖州祖若父世掌膳羞祖逮事憲宗扈駕南伐世祖賜
名刺沙赤父恕俱善其職侯嗣職時年十八慷慨多能
滋味稱上意游膺寵錫至元二十八年受勅命官上都
大倉使階敷武校尉元貞元年進忠翊大德三年受宣
命官上都尚食局階昭信校尉六年進武畧將軍八年
改奉議大夫至大二年提點太府監內藏庫階朝散大
夫三年遷中尚院判官皇慶二年以中順大夫同知大
同等處備儲軍民總管萬戶府事延祐五年以中大夫

克益都般陽等路淘金總管至治元年二月卒于官年六十五十一月朔葬奉聖州李家堡之先塋其孤賴持事狀乞銘于史氏謹按侯之行事從征為顏有所俘獲閔其悲號遺以衣糧而縱遣之御膳構殿被旨董役前時有司市上供諸物支吾濫溢侯在尚食局縷縷稽覈每歲省市直十五萬貫毛局造作歲買羊羨屬吏久逋官羨數萬斤俟在中尚院一一徵納是歲省市直五萬餘貫凡屯田歲收有羨必取直而鬻之及內府常供有

缺又出而糴之俟謂屯田本以裨國用歲給宗正部人
糧餉之外宜悉種糜麥以應內府之需安於故常者弗
察朝廷卒從侯議迨今歲入麪以斤計者四十萬糗張
以石計者五伯視常費可歲省四十萬貫民戶納金官
執權衡十羸其二三行賂乃頗減殺侯痛革姦敝且免
按督之擾賦金之家鼓樂頂香老少詣庭羅拜以報德
寧海得金塊重一斤許狀如山侯驛進闕下御賜繡衣
錦勳以示旌獎云余於其釋俘囚也嘉其惠於其省國

費也嘉其忠於其革金賦之敝也嘉其公且廉侯其可謂能臣也與善善者史氏之筆是宜銘侯娶祖繼李男五長帖木赤蚤喪次楨銓蔭父職次伯帖木兒次完者禿次成童女一適上都灤陽驛提點宋顯孫男二銘曰惟辟玉食克世厥職移治它官亦忠于國

五朝眷隆三品秩崇史氏銘之用責幽宮

故咸淳進士鄒君墓志銘

泰定甲子

泰定元年七月壬子余友前進士鄒君卒于家其孤將

以是年十一月己酉安厝于所居少余二歲相好如弟兄於其喪弗獲哭死弔生銘其可辭乎君諱次陳字周弼一字俛道撫宜黃人少馳俊譽年二十三以書經義第一貢禮部明年賜同進士出身其先治平丁未進士諱極仕至治南西路提點刑獄考諱子宜嘉熙庚子淳祐丙午兩預鄉貢晚以特奏名仕衢州西安縣丞君未擢科之前侍親宦衢時留丞相夢炎家居與趙守淇識君偉器期以早顯咸淳甲戌果副所期未及受官宋祚

已訖遂隱不仕邑近十五里有大姓譚氏待君以賓師
禮情誼篤甚自邑徙而依焉至元丙午新屋構成君父母兄
弟俱存前衢守趙公宣尉湖南寄一樂二字扁其構兄
次傳昔年與君同薦二親即世聚處如初教兄子友直
暨衆猶已子各成才為學官不幸不壽延祐庚申兄貢
士歿君哀念感疾至治癸亥秋病逾劇年餘竟不起君
娶管氏子男成大前邵武路建寧縣儒學教諭女適吳
仲益李明孫李仲謀鄧彥舉馮與權孫男阿買鐵漢孫

女適涂適張其二幼君之才名中閨外肆雖韜光晦迹
縉紳高之仕者問政過者造廬接物煦煦如春陽之溫
未嘗疾聲厲色愛人不間親疎遠邇其憂人之憂也苟
恩所能謀力所能極靡不竭盡其情教人亹亹忘倦怠
天朝貢舉制下來學之士益衆一經指畫文悉中程卧
疾五載講授猶不輟訓誨必本於行議論必符於理古
文時文韻語儼語一一有法取龐德公遺子孫以安之
義榜書室曰遺安其遺橐若干卷號遺安先生集外史

抄十卷俱可傳也卒之日不惟士大夫傷惻下至兒童輿隸亦共歎惋君其何以得此於人哉銘曰 疇廓其哀疇閑其庸曷嗇曷豐亶來者之聰尚聞其風

臨川士饒宗魯妻周氏墓誌銘

饒宗魯臨川士之好脩者其配周氏儒家女諱得清龍興進賢崇信鄉人大父士明受大臣薦充史館檢閱父宗武以孝友稱生而端重不妄言笑年十七嫡于饒饒有母喪十餘年殯淺土既廟見請殯所拜省愴然興不

逮事之感曰喪久不葬禮乎夫愧其言遄治葬奉夫
之繼母尤謹君舅疾革夫以官事羈郡城及大故奔
喪至家凡附身之物必誠必信靡不備具族黨賢之
君舅已沒夫之異母弟生曰吾父同氣也吾愛之如
吾子然後一家之人視之不異於吾子平居律諸女
以己勗諸子以學不令少有懈怠至治癸亥十
月辛巳以微疾終子四約絰經紀約從予在京
師聞喪乃歸絰後於母八月而卒經後於母五月而卒

女子子三周文頴王宗震于珂壧也孫晁生予每嘉宗
魯賢士知其內有賢助以予所聞養舅姑敬而有禮相
夫君順而有規淑子女嚴而有教御家衆慈惠而有威
綜家務勤儉而有度是其德也其夫自謂吾妻遇事迎
見立解多暗合於理倉卒之變人所難處而有深慮閑
逸可以少肆而無惰容蓋其天質然然以婦德之賢克
儼其夫贏其家家之福未艾而身之壽五十止殆事之
不可期者又二子相繼夭折悲夫悲夫泰定甲子宗魯

使人來曰亡妻將以十二月庚申葬建昌南城太平鄉
之和坪斬一言昭諸幽志之銘之以授其使銘曰
齊其賢不齊其年奚其然猗嗟乎天

故金溪逸士葛君墓志銘

金溪之葛號著族其先縣番陽徙宋建炎時有諱廢者
能率民兵衛鄉里事聞于朝將賞以官辭弗受後以子
貴授承議郎子逢時與陸文達先生同年士知南康軍
星子縣其族以進士貢禮部者常有之君生淳祐甲寅

距承議五世繼祖其名聖時其字也自少工進士業業成而科廢國朝廷祐初科復而君老矣至元間時務糾紛君應接繁劇中節理善保其家產且有增益築居室于舊基又為市以通貨物以餘力新青田三陸先生祠予嘗拜祠下宿于君之家歎君逸才未獲用至治壬戌八月作四言十二句銘辭訓諸孫十八日忽得疾越十日卒年六十九曾大父宗允大父元鎮隱德弗耀父某鄉貢進士君娶陸文安先生四世孫女先十八年卒子

男五長鼎實先二年卒次幼成陸璣玉成元傑女三適王者一適鄧者二孫男十女三將以某年月日葬于里之某原其邑人吳棟為其子乞文以志墓予固識君不辭而為之銘銘曰

山老椅梧淵韞珠天闕珍儲疇其須猗嗟斯士不顯世
蓋將有遲遲來裔

故貢士蕭君墓誌銘

吉水蕭如愚以書來言曰某之從子立夫為皇元延祐

進士不幸而天嘗辱銘其墓某之仲兄采字熙績昔為
宋景定貢士今幸以壽而終終之時執某之手顧其遺
孤欲有言而未發某問之則曰立夫三十二而死尚得
吳文以志吾生七十五年死而無所託以傳後虛為一
世人矣哀哉某與其哭泣未及答而絕追念遺語悲不
自勝其忍死吾兄乎將以某年某月某日葬某原不遠
萬里走京師乞一言以慰死者之心於地下仁人必為
之惻然興哀也予發書而歎曰弟弟孝子之情若是哉

謹按貢士之考諱符世宋咸淳戊辰省試以詩經擢居
第一其經義流播四方學者視法式貢士受庭訓未弱
冠與鄉貢歎然於藝之未精其後藝精而科廢每戒諸
少謂文事它日必興勿以不為時用而荒棄所業督之
親師友工詞章汲汲如恐弗逮未幾貢舉既復立夫進
士出身授南豐州判官以歸貢士喜曰吾家詩學之緒
不墜矣嗚呼予嘗聞先輩言科舉為老英雄之術蓋魁
碩卓偉之秀生長治平之世無它途可自奮迅俯首帖

耳于場屋間操數寸之管書盈尺之紙微覬於一勝得之則志願甫畢失之則抱恨沒齒若貢士君事勤家學而未踵世科值時變更隱處自晦年邁而不我俟竟莫少展所長正色不動以服彊暴而化其鄉循理無違以銷黠悍而寧其家乃其橐錐之末微見十百之一二者爾其生也宋淳祐戊申九月下旬之四其卒也元至治壬戌九月下旬之五考仕衡州推官妣易氏兄弟四人伯暨叔蚤亡如愚其季也娶劉繼郭繼文子貴孫順孫

女柔則先逝孫陽端吉端泰端銘曰

家無贏餘而猶樂施躬有抱負而弗獲試視其墓題繫

宋貢士

故處士劉君墓誌銘

人父莫不期其子之貴人子莫不期其父之壽所期乎
子者期其得祿以養於父也所期乎父者期其得年以
受養於子也韶州路曲江縣主簿劉中孚之父處士君
其督予以學也汲汲若追奔而逐逃其勗予以仕也切

切若食饑而飲渴子自為儒官以至於膺朝命一而再再而三欲留養輒不許曰汝養吾志欲迎養亦不許曰汝母以養吾口體為也子順命不敢違君年七十終於家子奔喪來歸治喪畢遺予書謂不肖孤官嶺海生不及養病不及藥沒不及斂踰年甫得葬未得銘烏用子已斬焉衰絰不能遠走萬里泣血以請敢以狀聞伏惟哀人子不死其親之心悼其亡恤其孤以少逭中孚不孝之罪予視書惻然雖嘉其父之欣欣以死寧能不悲

其子之戚戚以生者武蓋父之所期愜矣而子之所期
未有艾也君吉水著族居明善鄉之億田宋慶歷以後
登進士科者十有四而提刑郡守通守最顯高祖彥宏
曾祖汝賢俱將仕郎祖夢龍游臨安府庠以族人司戶
參軍絢之孫鏗為子君之考也君諱時明字幼文少從
伯兄學日記數萬言課所業頃刻成文字畫得米氏體
無它玩好惟貯書淑子二事家非甚贏而賑饑歎賙貧
病鄉人歸德焉與弟同爨內外無間言待從子三人如

子從子養君亦如父故君之子出仕得無後顧憂生宋
寶祐癸丑秋季卒元至治壬戌冬仲配黃氏銘曰
子承志而仕父適志而逝予其銘諸以綏遺孤

吳文正集卷八十